

靜

娛

亭

筆

記

靜娛亭筆記目錄

卷二

六事箴言

愛惜人才

皖北民風

無心道人

陳伯謙

兵差行

制義取士

孝廉方正

海外異聞

林少尉殉難

田玉梅大令

靜娛亭筆記卷二

賀縣 張培仁 紫聯

六事箴言

葉玉屏先生所集六事箴言。一爲持身。二爲持家。三爲居官。四爲居鄉。五爲處事。六爲處人。皆先正格言。有益於身心性命者。言極平易。近人不取峭刻激厲之詞。而耐人尋味。雖終身用之。有不能盡者。謹錄數條於後。

林浦曰。誠無悔。恕無怨。和無仇。忍無辱。畏能止禍。足

能止貪

程母侯夫人曰人患其不能屈不患其不能伸

張文節曰人情由儉入奢易由奢入儉難

程明道曰治怒爲難治懼亦難克己可以治怒明理可以治懼

司馬溫公曰吾無過人者但生平所爲未有不可對人言者耳

張無垢曰倉猝患難中處事不亂必其胸中器局不凡素有定力不然胸中一亂何以臨事

黃魯直曰讀書欲精不欲博用心欲純不欲雜

汪信民曰人常齟得菜根則百事可做

羅景綸曰戶樞不蠹流水不腐周公論壽必歸無逸
王伯厚曰處百患而求平安者其惟危懼乎故乾以
惕无咎震以恐致福

呂叔簡曰待人要和中有介處事要精中有果認理
要正中有通

忍激二字是禍福關

夏寅曰君子有三惜此生不學可惜此日間過可惜

此身一敗可恨

程漢舒曰看他人錯處時時當反觀內省
熊勉菴曰治生莫若節用養生莫若寡欲

史晉臣曰嗜欲正濃時能斬得斷怒氣正盛時能按
納得下皆學問得力處

德業常看人勝於我者則愧恥日增境界常看人不
如我者則怨尤日寡

崔南有曰人心靜則百事可做

持身上

司馬溫公曰孝之大綱有四一曰立德二曰承家三

曰保身四曰養志

劉忠定曰子弟甯可終歲不讀書不可一日近小人
楊大年曰童稚之學不止記誦當養其良知良能當
以先入之言爲主

呂榮公曰無好人三字非有德者之言也後生戒之
羅氏訓世編曰孝子事親不可使吾親生冷淡心不
可使吾親生煩惱心不可使吾親生驚怖心不可使
吾親生愁悶心不可使吾親有難言心不可使吾親
有愧恨心

張氏訓子書曰人有三成人知畏懼成人知羞恥成人知艱難成人否則禽獸而已

呂叔簡曰人子之道莫大於事生百年有限之親一去不回之日得盡一時之心卽免一時之悔血氣調於喜懽疾病生於惱怒壽親之道無他一悅字盡之矣

陸桴亭曰教家之道第一以敬祖宗爲本敬祖宗在修祭法祭法立而家禮行百事舉矣

父子之間不可溺於小慈自小律之以嚴繩之以禮

則長無不肖之悔

陸清獻公示子弟曰讀書做人不是兩件事將所讀之書句句體貼到自己身上來便是做人的法方算得能讀書人

以上持家

馬廖曰百姓從行不從言

卓茂曰律設大法禮順人情

魏鄭公曰兼聽則明偏聽則暗

劉晏曰論大計者不惜小費

羅從彥曰士之立朝要以正直忠厚爲本正直則朝

廷無過失忠厚則天下無嗟怨

呂正獻公曰爲政去其太甚者人才實難當使之自新豈宜使之自棄

呂本中曰當官先以暴怒爲戒事有不可當詳處之必無不中

秦觀曰禍莫深於窮治

王伯厚曰烹魚煩則碎治民煩則亂故以叢脞爲戒器久不用則蠹政不常修則壞故以屢省爲戒多事非也不事事非也

吳草廬曰縣之於民最近今之福惠所及最速莫是官若也

薛文清曰爲政以通下情爲急

楊一清曰當今爲政之務在省事不在多事在守法不在變法在安靜不在紛擾在寬簡不在煩苛

呂叔簡曰爲政以維持世教爲主世教不明風俗不美只是策勵士大夫 變民風易變士風難變士風易變仕風難仕風變天下治矣

情有可通莫於舊有者過裁抑以生寡恩之怨事在

得已莫於舊無者妄增設以開多事之門

鄒忠介曰今日世界能言者爲次惟默默調停者爲上顯而有名者從名根起見隱而濟事者從蒼生起見

仁可過也義不可過也

蔣楚珍曰安民者何無求於民則民安矣察吏者何無求於吏則吏察矣

陳眉公曰任事者當置身利害之外建言者當設身利害之中

彼將自擠

李文定公曰人不必待仕宦有職事而纔爲功業但隨力到處有以及物卽功業也

張忠定公曰詢君子得君子詢小人得小人

許魯齋曰用人當用其所長教人當教其所短

夏忠靖公曰某幼時有犯未嘗不怒始忍於色中忍於心久則自熟殊不與人較量何嘗不自學來

薛文清公曰在古人後議古人之事易處古人地爲古人之事難

呂叔簡曰臨事肯替別人想是第一學問爲人辨冤
白謗是第一天理

柔而從人於惡不若直而挽人於善直而挽人於善
又不若柔而挽人於善之爲愈

責人要含蓄忌太盡要委婉忌太直要疑似忌太真
禍莫大於不仇人而有仇人之辭色恥莫大於不恩
人而有詐恩人之狀態

兩人相非不破家亡身不止只回頭認自家一句錯
便是無邊受用兩人自是不反面稽唇不止只溫語

稱人一句便是無限寬舒

余行年五十始悟得五不爭之妙不與居積人爭富
不與進取人爭貴不與矜節人爭名不與簡傲人爭
禮不與盛氣人爭是非

君子不辱人以不堪不愧人以不知不傲人以不如
不疑人以不肖

陳眉公曰天下容有曲謹之小人斷無放肆之君子
袁了凡曰一事而關人終身縱實聞不可開口一言
而傷我忠厚縱聞謔亦宜慎言

高道純最樂編曰人用剛吾以柔勝之人用術吾以誠感之人使氣吾以理屈之天下無難處之事矣

座右編曰凡人行己公平正直可用此以事神而不可以此漫神可用此以待人不可恃此以傲人雖孔子亦以敬鬼神事大夫畏大人爲言況下此者乎史搢臣曰容得幾箇小人奈得幾樁逆事過後頗覺心胃開豁眉目清爽

攻人之惡毋太嚴要思其堪受教人之善毋過高當思其可從

天下事未有理全在我非理全在人者。但念自己
幾分不是。卽我之氣平。肯說自己一箇不是。卽人之
氣亦平。

唐翼修曰。面贊人之長。未必深感。惟背後稱人長。則
感之深。面責人之短。未必深恨。惟背地言人短。則恨
之深。

彭定求曰。臨事讓人一步。自有餘地。臨財放寬一部。
自有餘味。

劉宰每月旦必治湯餅會族人曰。今日之集非以酒

肉爲禮也。尋常宗戚不睦，多起於情意不相通。今日必會飲，有善相勸，有過相規，有故相牴牾者，彼此相見，亦相忘於杯酒從容間，豈小補哉？愚爲可推而行之，以上處人

王定九先生曰：儒者漁獵藝文，一毫無獲於身心。聖經賢傳所以維世道、正人心，所當設誠而力行之。而先儒之言皆足以補經而翼史。晉陽牧葉君有六事箴言，一帙至約至精，淺之爲愚，夫婦可與知能推而極之，爲賢知所莫能外，可謂簡而該矣。

或曰無乃太簡曰否否君子體道視力行何如耳
豈在多言哉

愛惜人才

今天下輒患官貧蓋官貧則廉者少有議將養廉之
數加重者京官本無養廉似不得不加頃見友人私
議未識能行否現在官之最難爲者莫過於州縣州
縣者人才所由出也今州縣之養廉已爲虛設坐扣
捐攤之外每年尙須補解若干以此訓廉是南轅而
北轍也愚以爲如欲其廉必使之裕 國家經費有

常從何得此鉅款只有挹注之法所謂以羨補不足也各督撫合計一省之中優缺幾處賠缺幾處優缺各州縣每年公私所費幾何所籌之款不可刻覈務令充然有餘此外尙可餘銀若干以分潤賠缺之州縣賠數之多寡卽潤數之多寡務令各得其平如何不敷則不免動用釐金矣庶才德之士以無所掣肘而得以展其才全其德而不肖者亦無可藉口焉由是得以久安其位而官民一體妍究不緝而自靖禮讓之風蒸蒸日上矣

今之時官窮本無可裁之陋規夫陋規之病民而應
裁者無待上司之飭禁言官之論列民間早已上控
而請禁革之矣若相沿已久民自安於成例而有意
挑逗之是使刁民得仰承風旨而與官爲讐也各省
之優缺卽各省辦公之元氣也博整頓之名而令元
氣日削始而病官中必病民終必病國

各大吏養廉優厚其中或間有自然餘潤自可從容
辦事况名德相望於州縣本無予取予求之慮目下
第一應辦之事莫如裁革過境夫馬舟車之費酒席

門包之費到任供應一切器具之費此等花銷於上司無所益十股之中六七歸僕從材官之中飽而已此等人百中無一善類非嚴馭之無有不狐假虎威者不用爲是設斷不能不用者亦不可多用近日大吏之賢者嚴馭僕從少其數而厚給之資必使之無擾於屬吏焉屬吏沾恩卽百姓沾恩誠莫大之陰功矣

州縣旣廉刁民不能挾制自然法立令行善者知恩劣者知懼盜賊邪匪無從托迹矣非廉吏不足以辦

保甲非廉吏之有資者亦不足以辦保甲

求治必自保甲始

皖北民風

包慎伯大令

世臣

曰李申耆以翰林改官皖省鳳臺

令多善政常輕騎率健勇循行閭里每捕盜輒出其不意得其渠魁又察其中有重氣節矜然諾者撫用之盜遂斂迹辛未秋柏菊溪任兩江總督儀徵有劫殺巨案戕一家三命總督偵得兇盜爲蒙城人匿於鳳臺嚴檄兩邑令限一月捕送君偵知容隱兇盜之巨猾不受捕乃召夙昔撫用者至內室賜之酒饌曰

吾當解組歸里門故與若作一劇飲受撫者怪其語不倫請其故君示以督檄受撫者曰固知其人匿巨猾家然力不能取君曰若力能取者吾早以捕事責若矣吾卽去此若亦終不能做好人故與若作別耳受撫者嗚咽良久曰有一計或可試行之收役家屬於獄而發硃諭簽役往然三日不回則役死猾家矣役之妻若子可終身伺候夫人公子供灑掃幸得延宗祀君諾之猾家距城廿餘里受撫者卽日至猾家猾歛之曰不見已三載何幸來此得毋以儀徵案耶

乃示以硃簽曰信在此可召出共飲而商之兇盜出則曰我公之新友彼則舊友且我只一身彼則一家顧爲新友之一身陷舊友之一家耶我卽就擒耳次早猶遣長矛二十護送至城門而返蓋兇盜至趨勁恐受撫者非其敵也君初遭受撫者下鄉於署內製一至堅之檻車並集昇者護者百餘人以待之受撫者以盜至君一訊其姓名立檻解蒙城而自督護之去蒙城七十里中道有鎮爲分界所檻車入飯店君降輿當門坐環觀者如堵君曰此巨盜斷不能捕得

我竟捕得若等知我樂否命侍者徧飲其父老笑語
久之乃升輿行猾已遣數十健者來刼見君與衆酣
飲于店中遂出鎮外候良久君輿過猾黨問檻犯何
尙不來答以隨後猾黨返至店則早已毀店後牆昇
檻車前去計且抵蒙矣猾黨旣返君乃改乘快馬疾
馳至蒙會蒙令聯銜通稟已遵檄捕得盜交蒙邑解
儀徵歸案訊辦君返鳳之次日兇盜越獄遁去蒙令
先以虧空奉總督嚴詰又失兇盜遂縊而死君嘗語
予曰鳳潁泗三府一州如練集五千人可以橫行天

下然惟其豪能用之官用之必帥至千里外或客兵勢盛足相鈐制乃可否則驕蹇難爲降伏

百菊溪制軍齡有能事之聲今觀此事則其人之辦事必多疏謬大拂人情概可知矣盜爲殃民之尤者至盜而刦殺事主至三名之多其兇悍膽大目無法紀見者心傷聞者髮指此而不取兇盜而痛治之然後懸首示眾不足以安閭里而快人心奚待問哉但鳳嶺一帶悍風素著州縣之苦或如倒懸制軍久知之矣今旣能偵知兇盜之匿於鳳

臺境內灼然不謬矣而鳳蒙兩縣官之苦况民之
黨惡又若不知惟嚴責其擒盜而已未獲盜之先
或應酌給花紅懸賞以待之既獲盜之後亦應預
計如何撥兵護解方可不至疏虞皆置之不論而
火急文書只知責備州縣而已是制府之捕盜舍
責備州縣之一法外無他法也夫州縣非不應責
備者也其平日吏治若何缺分若何地方之貧富
風氣之良頑時勢之推遷必知之熟而後責備之
獎勵之賢者舉之不肖者斥責之不得已而後刻

夫之庶與 國事有益而人心亦因之而靖且服
今用一味鬱法卒至兇盜仍逸於法外蒙令反墮
於法中想其倉皇於幽室之內計無復之以一繩
畢命且有虧空爲子孫累雖與之有夙怨者聞之
亦當落淚是以令之命代盜正法也儀徵事主之
寃不能伸 國家之帑項無可追轉爲兇盜所笑
夫而後更藐視 王法爲不足畏相與勾結聯絡
結成死黨愈聚愈多延至近日而捻匪之勢張矣
兇悍之風爲古書所不載遠慮者所深爲太息也

百制府捕盜之法具收效如此

同治末年捻逆張甚幸李伯相率劉省三軍門傳銘

排眾議持定見以平之想根株已鏟芽孽應不復

萌時有東捻西捻之分西捻尤悍而難制有謂湘

勇非其敵手恐難禦侮鮑春霆軍門竟大創之於

楚豫之交所率者湘勇也可見淮捻雖強湘勇亦

不弱自在用之者何如耳況淮北一帶

皖之廬鳳
穎江南之

淮徐豫之陳州彰德汝甯光州齊世家大族名公

之究沂曹濟風氣好勇大略相同巨卿冠蓋相望保桑梓而衛良民自早有善策矣

若任其所爲大家必先受其害也因記李鳳臺事而并書之

無心道人

李申耆先生

兆洛

養一齋集中有無心道人傳云王

君協名應辰號菽園嘉慶戊午舉人辛酉進士選四川新繁縣知縣戊辰以註誤去官歸十年而卒年五十六無子以兄子家瑞爲後君天資忼爽爲文章踔厲風發儕輩斂手詩筆尤豪邁服膺李義山楊誠齋以爲義山直追工部誠齋善學青蓮爲詩甚多未達

以前日苑村集需次都門曰金臺剩稿官於蜀曰蔗
香詩鈔歸田後曰無心道人詩鈔當胡豫堂先生視
學江左號嚴明能得士君與同里徐紹基高觀國宜
興則任烜路同申無錫則顧皋皆所賞拔在官頗得
士民心而縣素號饒邑君絕苞苴之私不能飾厨傳
稱過客意故上游及同列皆不喜戊辰冬舉計典有
日者素識君而往來於藩司之門自省中遺君書云
方伯將以計典黜君矣得金若干乃可免緘其書以
方伯印封發之君得書笑曰鬼蜮乃敢白晝見藏其

書而以其事白制府制府以爲脇持也怒以才力不
及填計典立委員攝印署理委員至君出見索其委
牌而委員以制府促督不及待司札無以應君笑曰
是亦可詐耶呼騶欲械治之委員恐馳去訴制府謂
某抗制府命且辱之制府怒命中軍提兵隨成都府
知府往捕圍其署大索獲日者所致書毀之然後捆
君歸於省置之獄以抗不繳印奏禍且不測於是通
省大譁投謗書盈於路頃之聞於京師御史撫以奏
奉 旨查辦然後出君於獄放之歸而以病瘋覆奏

此制府與方伯可謂志同道合矣以索賄上稟則從而斥之又出兵以捕之卒得其緊要書函而毀之使之無可脇持而後可得志卽有星使來亦不過以腰纏分潤之耳

陳伯謙

又曰江陰陳伯謙 柄德 以乾隆丁酉科拔貢得徐州

豐縣教諭升安徽旌德縣知縣君之治縣也撫字善良惟恐傷之鋤擊豪強不顧叢怨性方嚴簡於酬對以故不中上司意同列亦無推輓之者四年中再委

餉差輒彌年歲星霜之苦防護之憂資斧之竭蹶况
瘁百端卒以忤上官旨藉事被劾以去旌德土豪朱
則治者與巡撫胡公克家有舊橫於里中向不慊於
族之出戶家人李滿使其奴縛毆之垂死而召滿之
父使領歸已死則謾曰其父縊殺之其父脇於勢不
敢控則治之族朱義憤而鳴諸官君往驗毆傷累累
也坐則治絞抵挾勢爲關說者百端君不動未幾而
又有汪五貴之獄邑民汪松控其子五貴死紫清觀
前田中方萬福兄弟三人實殺之詣驗則屍在田中

而身與地皆無血污一刀置其旁亦繡澁與傷痕不
合五貴所居室則血跡狼藉汪松雖指控而應答指
畫皆汪長春者代之問長春何人則松之族而事松
爲父者益疑焉返而鞠之盡四十三晝夜始得其實
蓋五貴之妻梅氏有姿長春通焉松之弟柏亦通焉
長春業屠家少裕五貴藉奸婪索之不稱意或毆辱
之長春不敢校而私憤焉長春偶與五貴口角松解
之留長春宿其家長春中夜起將從梅氏則柏與梅
氏宿而五貴睡於足下益憤潛出挾利刃伺之黎明

五貴起將出戶長春迎而剗其喉五貴仆柏驚而逸
長春知不能逃因頓首於松曰若子已死報官則長
春亦死梅氏應發官賣一家破矣若宥我者長春固
翁義子事翁姥終身是無子而有子也不然長春到
官必盡揚翁姥之醜松却於其說曰然則若何長春
曰紫清觀方萬福兄弟吾讐也其觀前田卽五貴所
耕也置屍於田而以萬福謀殺控則吾讐可報而五
貴不徒死矣松遂從其計辭旣定乃出方萬福於獄
拘梅氏起兇刀獄立具上之郡守左公輔左公改姦

婦梅氏爲呂氏其姑也亦與長春通太守惡導姦釀命故重致之案未招轉而呂氏縊於宣城之獄汪松子死妻復死媳亦不能保一家又蒙醜聲朱則治之族從而愆愆之乃購人赴都察院翻控事下巡撫時巡撫卽胡公克家竟以姦婦互異奏參革訊比定案入奏一切情節與君原審並無出入惟以呂易梅問官念呂氏已死不得不爲梅氏開脫覆奏以該縣悞聽汪長春誣扳良婦爲姦幾陷重辟非尋常錯誤可比君遂失官而朱則治始擬緩決又援 恩赦減流

納贖從容歸家矣自古刑獄之慎無如我

朝封疆大吏奉宣德意州縣亦自顧考成罪人卽與死比必稍易情事令人輕比而狡悍之民亦窺見此意挾持州縣州縣往往縱釋有罪以就之漢時獄吏利人之死非憎人也自安之道在人之死今之時獄吏利人之生非愛人也自安之道在人之生一罪之成自勘驗購捕研審招解費數百金而不足也犯供偶有翻異上司別有意見駁案再審於是發犯回縣或檄調至省其費不可知矣其不中上司意者則情

罪不符辦理不善比擬失當皆可入之彈章百喙不能辭也

李申耆先生博學工文精天文輿地之學以翰林散館得知縣俯首風塵艱苦備嘗之矣是以丁艱後不復出山嘗見其南厓集書後云兆洛讀先生上孝感公書而廢然先生純篤之性沈毅之氣倘受大任卓然古名臣此豈後學所敢企及特其所志所歷頗似與兆洛相類竊謂今時州縣之任無可處理身爲傀儡心成荆棘旦夕不能保軀命甚

者遺累子孫而仍不能不上負君國下愧師友未
嘗不自咎其學行無本爲世用所窮不謂百餘年
以前風味已如此雖以先生盛德卓詣不能不嘆
息痛恨也陸清獻公爲令時與堦書云看來此道
大抵難行當尋一脫身計其後以陳文貞之薦遂
試御史雖不竟其用身則脫矣先生則竟以身殉
也悲夫治天下者豈能舍州縣以爲治耶而長此
安窮也

前錄申耆文二一首皆記作令之難其去官也皆無

罪而去也。今又觀此一則先生之心更深太息矣。州縣者撫字聽斷則風化所關治賦理財則國本所繫。是州縣之政卽國家之元氣也。豈不重哉。顧一任其江河日下。有才之士略有作爲動形掣肘。循謹者多自顧不暇。安望其盡心民事也。南厓清獻及先生皆才德兼備之士。或困死一官。或知難而退。卽袁隨園不得不托於詩以自隱。可惜可悲。昔僞周武氏讀賈誼王草檄。卽嘆曰。此人不用。宰相之過有味哉。此言也。彼武氏且知之。宜其時

人才樂爲之用而僞定一時也

兵差行

四川李香雪太守

映葵

工詩有石琴詩鈔中有兵差

行云赤緊赤緊兵差過境上站傳牌到下站供張謹

縣官一夜不得寢出郊迎候望引頸

一解

須與塵起

兵差來矣馬如游龍人如螳舉巷填街二十里城外

居民盡遷徙

二解

下馬問供饌入門責薪芻得雞索

鼻得馬索夫拔劍砍柱大聲呼折乾餽鬼不可無撻

丁役縛胥徒呵叱縣官如家奴縣官驚逃縣吏通解

三解

人告將軍將軍大怒何物縣官如此跋扈留滯大兵

是故非悞國法軍法豈容恕縣官聞之汗雨如注解

長跪謝將軍縣官亦人類既無點金術亦無懷璧罪

今年西賊來騷擾遍境內錢糧盡緩征公私成巨累

供億實大難請卽送旌旆將軍搖首酒氣拂拂揮令

速退解旁一點吏低語縣官亂世作縣不如考槃兵

差不去請挂冠縣官曰噫盍且加餐閉閣高臥聽彈

參將軍氣沮不自安亟呼軍士中夜捲甲走桓桓解

明晨吏報兵差過淨縣官偵之房屋折盡庫藏墊盡

倉儲無騰如洪水衝如烈火燼累民累官比賊尤甚
縣官悲號僅餘性命哭訴大府大府不應不曰軍士
橫猶曰縣官吝辦差不善已撤任

七解

如給如訴似嘲似謔奇事也非奇筆不足以傳之
州縣之難不獨辦差也辦差其一端耳受辱受賂
累比比皆是

制義取士

慨自鄉舉里選之難行也莫善於漢之徵辟其後亦
漸務虛名往往以拘逋債事弊之尤者莫甚於六朝

時所設九品中正度其立法之初無不欲得真才而
用之人之才具有大小而以九品權衡之使在上者
量才器俾各適於用亦各獻其才意亦善矣行之久
而盡失其真所謂上品無寒族下品無高門想其時
士之抱才而困於草野者不知埋沒幾許矣隋唐以
來所以不得不變法也中正廢而考校興焉或以詩
賦或以帖經王半山爲相而帖括之體始定卽今之
制義是也唐之名臣大半以進士起家名臣碩學指
不勝屈而睢陽張公亦由是途而起古之名將何以

過之孰謂文人不知兵事耶至於宋代其得士尤盛
元代偶廢科舉國祚不永而究不能廢明代專用科
目蔚爲一代之氣節文章可謂盛矣以武功顯者亦
時有之昭然增史冊之光皆由制義進身者也我
朝名儒碩學接踵而生根柢蟠深則枝葉峻茂未有
不工制義者誠以四子之書包羅衆有仁者見之謂
之仁智者見之謂之智其平日學問之蘊蓄襟懷之
抱負隨所值而自然流露實隱遇剛克柔克之教斷
非倉卒所能辦乃不得志於科名者輒謂入股之無

用豈通論哉且糊名易書則偏私之心無由生屢繩
考官以嚴法則請託之風絕宦途縱賂有貨緣而科
舉之中公道自在名篇佳製日引月新偉論鴻才雪
蒸霞蔚播於藝林者彰然可考耐人尋味非予一人
之私言也吾故謂舍徵辟外惟以制義取士爲灼然
無弊永遠可行之道若藉槍替行賄賂則其罪在人
非可以咎制義也

制義之關繫大經大法者鴻篇鉅製美不勝收擬編
纂一書公諸同好惜所見未廣恐有挂漏之譏名山

之業是所望於當代鴻儒矣偶摘三首可開初學心思調侃中寓諷刺者用代香山樂府之吟陳厚甫先生

鍾麟

貧而無諂題文云無諂之難也爲貧者設一境焉夫有求則諂貧者之常而無諂者其誰子貢爲設一境曰君子上交不諂事上且然而況同等然而世之人往往不免於諂何也蓋貧非心之所甘貧又爲境之最苦心由境迫諂以相習而成焉亦以捐形而見焉於此有介然自守者戛戛乎難之矣夫貧亦士之常耳世頗有諂者何哉華廬之日豪也我以藍

縷者介乎其側亦覺自慙形穢其不得不諂者勢也亦世風之變矣解推之不吝也我以偃蹇者至乎其前或可見而生憐其不可不諂者情也亦士習之差矣夫貧者卽不諂人已時覺其諂謂貧者原有諂態也貧者本不諂人已時防其諂謂貧者必以諂來也而況明明諂者乎諂有諂之容脅肩歟側足歟伺人之色而不敢正其色何容之不莊也則沮甚也諂有諂之聲逢迎歟便佞歟癡人之言而不敢盡其言何聲之不揚也則醜甚也有心之諂易見無意之諂難

見昂藏自得之中時出一言以巧爲迎合使人不知其爲諂焉者而諂之術愈工面譽之諂易窮背人之諂難窮朋友相逢之際必指其名以故示矜誇惟恐人知其不諂焉者而諂之心何已有時以喜爲諂有時以怒爲諂貧者曰彼一鄙人也吾以氣激之始則加以厲色繼則誘以甘言而彼必聽命矣此諂之一變境也有時以自屈爲諂有時以自矜爲諂貧者曰彼一狻人也吾以才逞之吾姑受倣物之名彼得居容人之量而彼必快意矣此諂之一變境也惟然而

無諂者鮮矣明知諂之無益而姑托以不諂是諂之事未彰諂之情仍在也且安知阨窮已久不更一再嘗試焉以展其諂之之技也而無諂者其誰明知諂之可羞而強制以不諂是諂之形未露而諂之念仍留也且安知艷羨既深不更轉羞爲怒焉以恣其諂之狀也而無諂者其誰若夫無諂者不知有諂者也磊落之胷於人皆作同等觀而何有於諂亦不知有貧者也激昂之概人世原無羞恥事而何厭乎貧不趨利則身榮不慕世則品貴不爲欲動則氣壯不爲

物屈則志伸貧者如此其庶幾乎原評云反面縱筆
正面斂筆形容刻酷豈有所見而云然乎子曰鄙夫
題文云定鄙夫之目人當知愧已夫人盡學爲鄙夫
而鄙夫徧天下矣此世風之變也夫子所由定其目
哉昔夫子惡鄉愿恐其亂德也降而至鄙夫卑之不
足道矣不知鄉愿好名鄙夫好利好名僞君子好利
眞小人僞君子不易知眞小人亦不易絕故夫子繼
鄉愿而論鄙夫享庸福者必多俗骨仁義道德之儒
造物報以虛聲必不報以厚實鄙夫則其名賤矣天

亦故憐其窮特開其富貴功名之路工揣摩者必挾
機心敦厚樸誠之士當事陽爲崇奉不必陰與周旋
鄙夫則其術巧矣人亦樂受其詐轉引以攀援推挽
之階而鄙夫之術成而鄙夫之名立無過人之識乃
有過人之貪習中絕無一物而逢迎之計偏百出而
不窮是愚而鄙者也若是者庸甚無過人之才乃有
過人之險出言每示大公而排擠之謀偏嘗試於不
覺是狡而鄙者也若是者惡甚心術旣壞而又不顧
聲名苟有一隙之可乘必竭蹶圖之以成其捷徑是

穢而鄙者也若是者陋甚聲勢旣張而復凌以氣倖
苟有一言之未合必睚眦報之以鳴其專踞是懷而
鄙者若是者劣甚不求道德不談經濟不論學問不
工文章耳目心思之用專精於勢利之一途厭然自
居於鄙夫而且以其鄙笑人以其鄙媚人是鄙夫之
柔者也當其昏夜乞憐不堪言狀人卽有以鄙夫目
之者彼且直任不辭也謂解人不當如是耶不顧禮
義不屑廉恥不畏議論不計禍福天地父母之身徼
倖於榮華之片刻悍然自命爲鄙夫而且以其鄙欺

人以其鄙傲人是鄙夫之剛者也當其大廷相對偃蹇自如人有以鄙夫稱之者彼乃變羞爲怒也謂好官我自爲之耳嗟乎舉世半庸才則士林不尊氣節論交皆俗物則儒者曷貴詩書鄙夫不足惜吾恐與之事君者不免受浼於終身也悲夫原評抉摘隱微無意不搜無筆不到文章到此未免爲造物所忌吾謂其閱歷已深爲鄙夫寫照看似戲笑怒罵其實神注下文所言皆題中應有之義

近讀浙江溫君

汝超

不患無位患所以立文感時撫

事也。言之真能於前人名作外。易樹一義。文云立
乎位者。無其具。爲今之俸有位者。慨也夫。有位難而
有位於季世。則不難。所患者。立之無其具耳。豈猶患
無位哉。且古之學優後仕者。其居官何若是難也。時
至今日。居官者。非惟不必優抑。且不必學。非惟不必
學抑。且學者。未必仕。而不學者。反易仕。天下皆可仕
之人。天下有不愧居官之人乎。有心世道者。所以顧
仕途而太息也。不然。夫人而有所以立。且患位之不
得耳。豈不能自立者。而可以有位乎。而吾謂生今之

世則無患是行舉言揚之興國家亦偶一舉行而俊
選之陳書不敵庸流之納舉所以興臺僕隸羣拜爵
於天家求賢繼俊之文君相原不循資格而眞儒之
拘謹不敵市井之螢緣所以駟僧頑童亦策名於仕
版然則居今日而患無位不共笑其迂哉誰問其所
以立者爲何如哉且夫位之不患其無者一由於世
運之日衰一由於人心之不正海內軍興紛然不靖
矣而不肖進身之路卽從此而開躬未列夫戎行假
微勞而附名鳳刻日未親夫文字求大吏而不次超

遷甚至少年佻健亦號從軍姦宄請張何妨援例位
愈輕則品愈雜指笏垂紳之地幾變爲納污藏垢之
區耳爲問古隆盛時幾見有此冒濫哉非世運之日
衰而何以倖位者之眾也私門賄賂所在皆然矣而
小人發迹之機卽由斯而入挾策以干權要借私書
而情託葭莩曳裾以拜門牆獻厚贄而恩聯師弟甚
至婢媵奴顏天良盡喪晚癰舐痔席恥何存位愈固
則志愈卑紆青拖紫之流不免有失節敗名之類耳
爲問古君子幾見有此趨承哉非人心之不正而何

以竊位者之多也夫然而其所以立者可慨矣問以錢穀則不知問以兵刑則不曉而朝夕營求之計無非攻利黷以飽私囊勸長上搜括民財陽善補苴而陰行侵蝕遇疑獄錄成鐵案顯張威福而陰肆貪饕蓋其得位之由來既不堪質諸清夜而其立位之權術亦何能對諸大廷若欲實以立功若何立德若何吾恐其掩耳而逃也愚乎不思夫然而其所以立者尤可惡矣問以人才則不舉問以風俗則不聞而方寸險狠之謀無非仗要津以洩舊怨一睚眦之憾必

復僞設崖岸而實密網羅一語言之釁必尋外逞蠶
紉而內憑狐鼠蓋其得位之伎倆既不容律諸聖賢
而其立位之機心遂不惜殘夫民命若欲試以立身
若何立名若何吾恐其汗顏而走也患乎不患噫名
器不可以假人至季世而幾操質券富貴本原於天
命至今日而別有徑途吾故曰無位不足患而其所
以立者斯足患耳此德隆位顯之大人所以甘投簪
於田里正已潔身之儒士不得不老死於蒿萊也夫
雖有過激處而筆致磊落可喜刻酷處亦有所見

而云然乎初學見之行文乃有議論

孝廉方正

吳縣夏秋田先生

廷榮

少孤覓父骨千里外負歸營

葬精岐黃術藉得甘旨奉母有所羸爲閭里貧乏者
助已則布衣粗糲終其身當道賢之踵門求見謝弗
敢當報以一刺而已力行善事實事求是咸豐初舉
孝廉方正制科人無間言庚申賊破蘇州乃衣冠自
縊可爲名副其實事平後里人爲之建坊延其居曰
孝廉方正孝子義士節婦貞女夏氏之室夏氏以秋

田先生舉孝子後舉制科先生之母守節三十餘
年先生殉難時女亦自盡隔巷爲潘季玉觀察第合
肥相國榜其門曰狀元宰輔祖孫父子兄弟叔姪翰
林之家各極其詣可稱的對

海外異聞

海外秘魯國有拔爾撒摩樹生脂膏極香敷傷卽合
敷痘不癢敷尸不腐

琉球國有金榴色似金可作器皿香踏沉速

印度國椰樹幹可造舟葉可覆屋實可療飢漿可止

渴又可爲酒爲糖節可作釘殼可盛飲食瓢可索綯
意大利亞國殺而多尼草人食之笑死
甘的亞島阿力滿草少嚼可療飢

何不取此草徧種各處以備荒年

聖多默島百果俱無核

祕魯國產厄馬鳥長頸高足翼翎美麗不能飛足若
牛蹄善奔走馬不能及卵大如碗可作盛飲饌之具
瓜哇國產無對鳥無足腹下生長皮如筋常倒懸枝
上毛色五彩不飲不食

亞利比尼國產弗思尼鳥壽數百歲將終卽聚香木成堆然火自焚遺灰成一蟲久之蟲復變鳥

印度產稍割牛角長四尺十日必一割不割則死人飲其血壽百餘歲 又產獨角獸其角長四五尺色明亮作飲器可解百毒

林少尉殉難

林小厓少尉名汝霖閩之上杭人官浙江仁和縣典史咸豐十年賊破杭州冠服坐堂上手一巨觥飲賊至大罵不屈遭賊攢刺而死眷屬亦殉難賊平後浙

人尋得君稿葬處爲之具衣冠改葬於孤山之麓林
處士墓傍且建祠祀之錢塘吳曉帆方伯題額曰足
以千古祠中楹聯極多尤佳者薛慰農觀察時雨云
大節匹閻公取義成仁青史從今尊縣尉忠魂依處
士補梅招鶴孤山終古屬林家仁和董敬甫工部嶺
行云勁節抗冰霜千樹梅花皆玉照叢祠倚林麓四
山鶴唳卽神絃林君死得其所死且不朽

田王梅大令

王紫詮廣文韻獲牖餘談內有田王梅傳真英雄也

今備錄於此田王梅字鼎臣蜀之西陽人貌文弱而
多力屈其臂數人不能伸伸其臂數人不能屈粵寇
入長江將犯金陵王梅方在京師欲謁當事獻方略
至則金陵已陷向帥方連營城下攻之不能拔王梅
願見大帥徘徊無與通者胡貳尹思變奉大帥令勾
當內應事偶見王梅懽若平生與之論軍事大奇之
爲言於趙太守太守召與語亦奇之乃薦之大帥王
梅乃說大帥曰官軍圍攻數月僅圍城之半耳城高
而多備急攻之徒損士卒無益於事近有謀內應者

請爲公入城覘之乃衣賊衣佩利刃散其髮蓬蓬然
下垂覆以黃巾至江東門賊出入要道所謂買賣街
也王梅手持筐實以餅餌魚肉若買而歸者遂自水
西門入訪內應者之居潛召諸人問其謀則曰吾屬
諸人誓不爲賊用願開門迎大兵殺賊問其眾則或
千焉或百焉王梅復徧慰賊巢至各門視其路之寬
隘遠近爲進兵計越三日復自西門出孑然孤行守
門者眈眈視王梅故從容坐城下若有所待遙見一
騎馬賊來前後導從數十輩王梅遽拂起曰至矣昂

然出城守者竟不之詰玉梅至大營備述所經備言
內應不可恃惟官軍向神策門進守者寡距賊巢稍
遠事或可濟乃約某夜預伏精兵於神策門外玉梅
率內應者殺守門賊迎官軍入計既定玉梅復入城
告以期眾果以賊耳目多又內應者多金陵人素怯
弱慮難遽行玉梅曰噫吾固知若不足恃吾已結壯
士五人苟得入吾事濟矣遂復出告大帥必偕五人
者入而後可圖玉梅用奇計竟能令五人者皆入城
及期內應者僅來十餘人耳夜深矣遂率以行遇邏

者斬之守城者悉睡熟亦盡殲焉僞賊酋臥城樓上驚覺躍垣欲逃玉梅以矛舂其喉擲頭於城外將斬關開城延大兵入而阻於賊之新立木柵不得行柵內大礮五皆向外稍覺礮卽發無可遮天將明他賊之夜巡者至見城上有殺死之賊屍卽吹角聲鳴鳴然他處亦吹角應之玉梅曰噫事不濟矣賊且大至吾寡不敵眾宜權避之皆退而匿賊麇集不知殺賊者何人下令閉門大索三日收疑似者百餘人殺之城啟玉梅竟偕五人者出先是大帥與玉梅計事定

遣諸將如期率兵往天已明而城不開忽聞角聲城上黃旂簇簇至知謀已泄遂整軍歸旣見城閉三日咸曰田生死矣至是與五人偕歸眾益奇之當時聞者皆咋舌絕不料三入虎穴殺賊如草者乃一書生也大帥奇其能將賞以官玉梅乃上書大概謂內應無功不敢邀獎奏惟常鼓我士氣以平賊方今將怯兵驕大爲可慮云云拂大帥意竟寢其賞玉梅仍依趙太守戎幕佐籌筆出則輕衫佩玉丰度翩然人疑是貴公子云玉梅之再入賊中也胡貳尹願與偕玉

梅乃僞爲賊渠以大索繫貳尹頸若鄉民之得罪者牽之入城後與同出

事險而文明田君膽識兼優一時無匹之概足以
照耀古今

張繼庾字炳垣江甯府學廩生父介福湖南桃源令
江甯失守炳垣陷於賊中里人吳偉堂自幼賈漢上
賊半爲所舊識佯受僞職陰以偵賊情圖反正炳垣
遂因吳徧結諸賊相與爲忘形交一日酒酣太息曰
吾觀公輩亦勞苦矣去鄉里捐妻子犯百險攻下數

十城然祿僅足自給小有過失朝夕不能自保也賊有泣下者炳垣知其可動語之曰

天子遣大將督雄兵數十萬陸續將到齊矣旦夕城必下公等與其事傷天理悖天常寡恩猜忍之逆賊與之同死何不啟城迎官兵入斬六僞王首以獻軍門取富貴事成公等受上賞事泄諉過於我一人不以相累眾皆感泣許諧炳垣乃以密書達向帥請以賊裝間道至軍前面陳機宜向帥許之期某月日官兵由神策門進旣而事不成有劉鴟頭者健兒也亦

炳垣所糾慮事泄禍及乃首之於獸醫沈姓者遂報
楊逆卽拘炳垣至究同謀炳垣嘗密書黠悍之賊姓
名數十人預藏於壁中至是給楊逆曰吾同謀者有
籍在吾不敢匿秀清大喜乃按籍收而殺之炳垣卒
以炮烙死同盟中有諸生賈鍾麟得脫詣向帥陳炳
垣死事狀言受害極慘久之乃得白於

朝予旌炳垣性機警糾眾至千餘人與向帥書問往
返數次賊竟無知者事機可謂密矣然卒以殞身惜
哉當賊鞠時炳垣堅指劉鶚頭沈獸醫始同謀而中

變賊雖不之信而二人不自安相繼逸出有知其事
識其面者久之首於官縛送向帥營中皆肢解以徇
讀曰王梅張繼庚二傳慨然嘆何地無才特皮相
者不能識卽識亦不能用況向欣然之器小而懷
者哉使王梅得遇曾李二公吾知其建樹當不亞
於一時名將也

靜安亭筆註

卷一

三